

共同經課 - 1 以賽亞書五章一節~七節

1 我欲爲著我所親疼者唱歌，是我所疼者的歌，論伊的葡萄園：我所親疼者有葡萄園佇真肥的山頭。2 伊開墾彼個園，除去石頭，栽上等的葡萄樹，佇園內起一座樓，閣掘酒窟佇遐；向望結好的葡萄，無拍算結野葡萄。3 恁倚起耶路撒冷者及猶大人啊，今請恁佇我及我的葡萄園中，判斷著毋著。4 我爲我的葡萄園所做的以外，猶有甚麼通做啊？我向望結好的葡萄，怎樣反轉結野葡萄啊？5 今我給恁講，我欲對我的葡萄園怎樣行：我欲拆去籬笆，互伊受吞滅，拆毀圍牆，互伊受吨(thún)踏。6 我欲互伊荒廢，無閣修整，無閣勸勸，反轉發刺仔及蒺藜。我也欲命令雲無落雨佇伊的頂面。7 因爲萬軍的耶和華的葡萄園就是以色列家；伊所歡喜的樹就是猶大人。伊所向望的是公平，反轉有暴虐；所向望的是公義，反轉有叫冤枉。

共同經課 - 2 詩篇八十篇一節~二節，八節~十九節

1 [亞薩的詩，交互樂官。調用做干證的百合花。] 以色列的牧者啊，導約瑟親像羊群者，求你俯耳孔聽！坐佇基路兵的頂面者，求你發出你的光！2 佇以法蓮、便雅憫、瑪拿西的面前，展出你的權能，來救阮。8 你對埃及徙一欖葡萄樹，趕出列邦，來栽伊。9 你佇伊的頭前傾空土地，伊的根釘深，就生淚滿地。10 伊的影遮密諸個山，伊的枝親像真好的柏香樹。11 發出伊的枝，伸到大海，伊的藤，淚到大河。12 你啥事拆毀伊的籬笆，出在一切過路的人挽伊？13 樹林內出來的山豬躑躅伊；曠野的走獸食伊。14 萬軍的上帝啊，求你倒轉！對天府落看，照顧此欖葡萄樹，15 保護你正手所栽的，及你爲家己所堅固的枝。16 伊已經受火燒，受刀剗；爲著你的面的受氣，in 就滅無。17 願你的手按佇你正旁的人，就是你爲家己所堅固的人子。18 按呢，阮就無倒退離開你；求你互阮得著活，阮就欲求叫你的名。19 萬軍的上帝——耶和華啊，互阮倒轉，互你的面發出光，阮就得著救！

共同經課 - 3 希伯來書十一章二十九節~十二章二節

29 對信，in 過紅海親像行乾地；埃及人試行伊，就沈落去。30 對信，蹺耶利哥城歷過七日，城就倒壞。31 對信，娼妓喇合用和平接納細作，所以無及毋順趁的人相及滅無。32 我欲閣講甚麼啊？欲講基甸、巴拉、參孫、耶弗他、及大衛、撒母耳，以及諸個先知，就時無夠額。33 許個人對信，創贏諸個國，行公義，得著應允，勒獅的嘴，34 拍熄火焰，閃避利刀；弱成做強，交戰勇猛，攻破外邦的戰陣。35 有婦仁人得著in的親人對死復活。亦有人受酷毒的刑罰，毋願受贖，是愛得著卡好的復活。36 閣有人受戲弄、鞭拍、以及鎖鍊、關監、諸個試，37 閣有人受石頭擲，鋸仔鋸，受誘惑的試，互刀剗死，穿綿羊山羊的皮奔波逐所在，抵著喪鄉、患難、暴虐，38 有的佇曠野、佇山嶺、佇石洞、佇地穴，四界漂流，諸個人是世間袂堪得有的。39 in 攏已經對信得著干證，若是未曾得著所應允的；40 因爲上帝給咱代先備辦閣卡好的事，是欲互in若無咱，就袂得著完全。1 已經有做干證的到許多，親像雲圍咱，就著放下逐號的重擔，及快快纏絆咱的罪，用吞悞，來走所安排佇咱頭前的路站，2 著注神看耶穌，就是做信的源頭及成尾者。伊爲著所安排佇伊頭前的快樂，就無要緊凌辱，忍受十字架，今坐佇上帝寶座的大旁。

共同經課 - 4 路加福音十二章四十九節~五十六節

49 「我來是欲用火穴佇地裡，火若已經著，我猶久愛甚麼？50 我有應該受的洗彼個洗猶未成，我迫切到怎樣？51 恁拍算我來，是欲互地上和平嗎？我給恁講，毋是，反轉是冤家。52 今了後，一家五人欲冤家；三個及二個冤家，二個及三個冤家；53 父及子，子及父；老母及查某子，查某子及老母；乾家及伊的媳婦，媳婦及乾家。in 攏欲冤家。」54 伊就閣對眾人講：「恁看見雲對西勢起，恁就講：『欲落雨』；果然有按呢。55 看見風對南勢吹來，恁就講：『欲燒熱』；也有按呢。56 假好的人啊，天及地的形色恁都看會出，怎樣袂會看出此個時啊？」